



Pou Biblikasyon Imedya: 09/06/2023

GOUVÈNÈ KATHY HOCHUL

GOUVÈNÈ HOCHUL ANONSE REYINYON PIBLIK POU PWOJÈ OTOWOUT KENSINGTON LAN NAN VIL BUFFALO

*Gen de reyinyon publik ki pral fèt nan 20 jen nan Buffalo Museum of Science nan
kad pwosesis angajman publik kontinyèl la*

Evalyasyon anviwònman an toujou ap kontinye

Gouvènè Kathy Hochul te anonse jodi a pwochen etap pwosesis angajman publik fòmèl pou pwojè Otowout Kensington nan Lès Buffalo, ki pral reyini de bò otowout ki te separe avèk estrikti a sa gen plizyè jenerasyon. Nan kad angajman kontinyèl sa a avèk kominate Lès Buffalo, Depatman Transpò Eta New York la pral òganize de reyinyon publik nan Buffalo Museum of Science, ki sitiye nan 1020 Humboldt Parkway nan Buffalo, madi 20 jen 2023. Reyinyon publik yo, ki pral fèt soti 11 a.m. rive 2 p.m. ak apati 5 p.m. rive 8 p.m., pral bay kominate a yon mizajou sou pwogrè pwojè a pandan Evalyasyon Anviwònman an ap kontinye.

"Pwogrè yo kontinye ap fèt sou sanbilizasyon publik la pou pwojè transfòmatè Otowout Kensington lan, ki pral refòme epi reyini kominate yo nan Lès Buffalo ki te divize depi twò lontan", **Gouvènè Hochul te deklare.** "Pwojè Otowout Kensington lan se yon gwo chanjman pou Lès Buffalo -- k ap ede geri blesi tan pase yo, ouvè nouvo opòtinite pou rezidan lokal yo, epi pote yon nouvo sans lavi ak idantite nan kominate a. Reyinyon publik sa yo pral bay rezidan yo yon lòt chans pou tande yo epi mwen ankouraje nenpòt moun ki enterese nan pwojè sa a pou yo patisipe".

Reyinyon 20 jen yo pral bay manm kominate yo yon opòtinite pou aprann sou pwogrè aktyèl la ak opsyon yo pwopoze pou pwojè a. Reyinyon yo pral prezante yon jounen pòt ouvè avèk plizyè estasyon, lidè pwojè, ak ekspè nan matyè pou pale ak kominate a, eksplike detay epi reponn kesyon.

Otowout Kensington lan ki te konstwi pandan ane 1950 ak 1960 yo, te ranplase sa ki te yon gran boulva twa vwa - Parkway istorik Humboldt la ke Frederick Law Olmsted te konsevwa - ak yon otowout anba tè ki te koupe koneksyon ant katye ki ozanviwon yo. Avèk jiska 1 milya dola Gouvènè Hochul mete sou kote pou pwojè sa a nan Lès Buffalo, katye yo ki te mal divize pa konstriksyon orijinal Otowout Kensington lan, pral reyini yon lòt fwa ankò.

Plan kapital sou senk ane, 32.8 milya dola, istorik Gouvènè Hochul la nan Depatman Transpò ke yo te adopte nan kad Bidjè Ane Fiskal 2023 a gen ladan finansman pou rekonekte katye lès-lwès yo atravè seksyon deprime koridò Otowout Kensington lan nan Lès Buffalo epi re-establi espas vèt la ke Humboldt Parkway te bay nan kòmansman san yo pa konpwomèt kapasite alontèm lyen transpò rejyonal enpòtan Otowout la te founi.

An total, plan kapital Depatman Transpò a gen ladan prèske 3 milya dola pou pwojè enfrastrikti ki fè pwomosyon ekite, konektivite ak opòtinite transpò multi-modal pou kominote atravè Eta New York yo. Anplis pwojè Otowout Kensington lan nan Lès Buffalo a, pwojè sa yo enkli rekonstriksyon Echanjè Bruckner-Sheridan nan Hunts Point nan Bronx, sa k ap transfòrme Otowout Bouk Enteryè ki egziste deja a pou tounen yon boulva kominotè nan Rochester, pwojè vyadik I-81 nan Syracuse, epi kouvari kèk pati nan Otowout Cross-Bronx nan Bronx.

Epitou, nan kòmansman ane sa a, yo te anonsé ke yo te bay yon [sibvansyon konstriksyon kapital 55.59 milyon dola](#) pou pwojè Otowout Kensington lan atravè Pwogram Rekonekte Kominote Depatman Transpò Etazini. Pwogram nan, Lwa sou Enfrastrikti Bipatit Prezidan Biden lan te kreye, se yon premye inisyativ nan jan li pou rekonekte kominote yo ki pa gen opòtinite epi ki pote fado desizyon enfrastrikti transpò pase yo. Pwojè Otowout Kensington lan se youn nan 45 pwojè k ap resevwa yon sibvansyon istorik 185 milyon dola.

An desanm 2022, DOT, nan tèt ansanm ak Administrasyon Federal Otowout la, te konplete [Rapò Kadraj](#) pou pwojè Otowout Kensington lan, ki te idantifye altènativ konstriksyon an pou avanse pou plis etid nan pwosesis anviwònman an. Altènativ konstriksyon an gen ladan ranplasman otowout souteren avèk yon tinèl sis vwa ant Dodge Street ak Sidney Street ak koneksyon kominote amelyore yo. Revizyon anviwònman an ap kontinye, pandan DOT ap evalye opòtinite pou kreye nouvo espas publik ouvè epi amelyore sekirite pou bisiklèt ak pyeton. Otowout Kensington lan transpòt apeprè 80,000 machin chak jou.

Pwojè a gen ladan tou rekonstriksyon Humboldt Parkway pandan I ap aplike karakteristik konsepsyon wout "Lari Konplè".

Reyinyon sa yo pral genyen yon estenograf, ansanm ak lòt metòd pou kominote a poze kesyon ak fè kòmantè. Anplis de sa, ou ka jwenn enfòmasyon ak mizajou yo sou [sitwèb pwojè a](#). Kominote a ka soumèt kòmantè ak kesyon tou lè li vizite oswa kontakte (pa lapòs, imèl oswa telefòn) [Biwo Sansibilizasyon Kominotè](#) a.

Depatman Transpò Eta a angaje pou travay nan tèt kole ak Vil Buffalo, Konsèy Transpò Rejyonal Greater Buffalo-Niagara a (Greater Buffalo-Niagara Regional Transportation Council) ak kominote ki nan anviwon yo nan chak moman pandan pwojè enpòtan sa ap avanse.

Komisè Depatman Transpò Eta New York la, Marie Therese Dominguez, te deklare, "Gouvènè Hochul te, epi li kontinye ap, defann rekoneksyon ak reyinyon

kominote yo atravè eta a. Pwojè Otowout Kensington lan se yon pati enpòtan nan vizyon sa a, epi Depatman Transpò a pran wòl ak responsablite li trè oserye. Pwojè sa a pral amelyore kalite lavi pou tout moun nan kominote sa a, men li enperatif ke li fèt avèk opinyon ak sipò kominote sa a. Nou vle asire ke piblik la enfòme nan mezi posib, pou asire ke nou kreye yon koneksyon ak kominote a pou wè pwojè sa a jiskaske li fini".

Reprezantan Brian Higgins te deklare, "Entansyon pwojè Kensington lan se retabli koneksyon kominote a. Angajman kominotè se yon pati enpòtan nan byen fè bagay yo fwa sa a. Biwo sansibilizasyon ak reyinyon piblik yo asire yo tandem vwa ak lide kominote yo epi enkòpore nan pwojè a. Nou ankouraje vwazen yo patisipe".

Senatè Eta Tim Kennedy te deklare, "Vwa kominote a te fè avanse pwojè Otowout Kensington lan depi premye jou a, epi sa nòmal pou li kontinye jwe yon wòl entegral pandan I ap vanse. Mwen ankouraje rezidan yo pou yo patisipe nan reyinyon piblik sa yo pou aprann plis sou DOT sou fason plan yo ap pwogrese, epi konsidere pwochen etap envestisman transfòmatè sa a nan enfrastrikti nou an".

Lidè Majorite nan Asanble a Crystal Peoples-Stokes te deklare, "Tanpri rejwenn nou nan 20 jen pou wè pwogrè ki te fèt pandan dènye ane a sou Kouvèti Otowout Kensington lan. Mwen kwè ke piblik la pral sezi anpil lè yo wè konbyen nan opinyon yo ki reflete nan mizajou nou yo. Mwen bat bravo pou NYS DOT, LaBella and Associates, ak Komite Pati Konsène Kominote ROCC pou tout tan ak efò yo te fè pou mennen nou kote nou ye jodi a".

Majistra Byron W. Brown te deklare, "Reyinyon piblik ki gen pou fèt pou Pwojè Otowout Kensington lan mete nou yon pa pi pre pou nou tandem sa kominote a ta renmen wè pandan pwojè sa a ap avanse. Mwen remèsyé Gouvènè Kathy Hochul pou angajman li kontinye nan pwojè sa a epi mwen ankouraje rezidan yo pou yo patisipe nan reyinyon 20 jen yo. Sa a se yon lòt opòtinite pou rezidan yo nan zòn pwojè a pou yo fè tandem vwa yo sou pwojè konstriksyon sa a ki fèt pou benefisyé kominote Nwa Buffalo".

Prezidan Restore Kowalisyon Kominote Nou an, Stephanie Barber Geter, te deklare, "ROCC kontan pou l rive nan pwen sa a nan pwosesis la kote n ap planifye sou plizyè nivo epi nou kontan pou nou gen kominote a ki vin konprann kote nou ye a. Envitasyon ouvè sa a se pou moun ki vle konnen pwoblèm nou te konsidere ak rekòmandasyon nou yo sou fason pou nou rive fè bagay sa yo. Nou envite moun ki abite bò wout sa a epi ki itilize wout sa a pou yo patisipe."

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)